

KERATAN AKHBAR

TARIKH : 1 APRIL 2024
AKHBAR : BERITA HARIAN
MUKA SURAT : 13

Proses kemas kini data PADU berterusan

Proses kemas kini data PADU berterusan

Maklumat lebih tepat diperlukan bagi merangka inisiatif yang akan diumumkan kerajaan

Oleh Mohd Nasaruddin Parzi
bhnews@bh.com.my

Petaling Jaya: Proses kemas kini Pangkalan Data Utama (PADU) akan berdaftar biarpun tempoh pendaftaran ditutup mulai tengah malam tadi.

Ketua Perangkawan Malaysia, Datuk Seri Dr Mohd Uzir Mahidin, berkata bagaimanapun proses kemas kini seterusnya tidak semudah sebelumnya kerana mereka yang masih belum mendaftar untuk kali pertama perlu membuat kemas kini maklumat awal.

Beliau berkata, profil setiap rakyat sebenarnya sudah tersedia dalam PADU, namun kerajaan memerlukan ia dikemas ki-

ni terutama maklumat berkaitan status pekerjaan, pendapatan, jumlah tanggungan serta alamat kediaman.

"Kepada yang tidak mendaftar dalam sistem PADU, maklumat asal demografi mereka sudah pun ada. Misalnya data pendaftaran negara. Setiap warganegara, mereka ada mendaftar untuk dapatkan kad pengenalan.

"Maklumat jantina sama ada lelaki atau perempuan. Cuma maklumat tempat kediaman mungkin berbeza. Data asas itu sudah ada, cuma kita perlukan data dinamik.

"Maklumat lain (yang sudah tersedia di PADU), contohnya jika mereka ada majikan, kita sudah ambil (datanya) dalam Pertubuhan Keselamatan Sosial (PERKESO), Kumpulan Wang Simpanan Pekerja (KWSP), kita sudah ambil maklumat itu (untuk dimuatkan dalam PADU)," katanya pada sidang media pada Program Pendaftaran PADU di Flat Sri Aman, di sini semalam.

Beliau berkata, tempoh akhir pendaftaran PADU diperlukan bagi membolehkan data individu yang sudah mendaftar dan



Mohd Uzir (tengah) bersama Datuk Bandar Petaling Jaya, Mohamad Zahri (dua dari kanan) beramah mesra dengan penduduk yang mendaftar PADU pada Program Pendaftaran PADU di Flat Sri Aman, Petaling Jaya, semalam.
(Foto Aswadi Alias/BH)

selesai dikemas kini itu, dianalisis bagi tujuan merangka bentuk inisiatif dan bantuan yang akan diumumkan kerajaan kelak.

"Kita perlukan satu titik 'deadline' untuk kita mulakan proses analisis, untuk kita merangka dan mencadangkan program bantuan yang perlu dilaksanakan untuk pertimbangan oleh kerajaan. Bagi mereka yang tidak mengemas kini atau yang mungkin ada kesilapan ketika melakukan kemas kini, akan diberi peluang pada masa akan datang.

"Kemas kini berkala (dalam PADU) ini adalah salah satu ciri kepada real-time data (RTD) dan ia tidak berbentuk sekali saja. Jangan bimbang, maklumlah dulu apa status sekarang. Selepas ini, ada perubahan, akan

dibuka lagi untuk pengemaskinian, untuk kita pastikan data yang terkini.

"Data PADU ketika ini (selepas ditutup tengah malam ini) adalah berpandu kepada data dari tempoh semasa yang sudah ditutup dan akan ada fleksibiliti (untuk mengemaskini) diberi selepas ini," katanya.

Pendaftaran meningkat

Beliau berkata, rekod menghampiri 50 peratus bagi pendaftaran PADU pada hari terakhirnya semalam sudah menyaksikan pencapaian yang baik, khususnya untuk kerajaan merangka bentuk bantuan mengikut segmen yang ditetapkan selepas ini.

"Seperti kita sudah lihat, memang sukar kita dapat 100 peratus. Jadi sasaran kita yang sudah dimaklumkan sebelum ini

adalah 50 peratus, itu adalah pencapaian yang baik. Memberikan perkara baharu kepada orang ramai terutama pengemaskinian data, bagi melihat keputusan yang segera, itu bukan perkara mudah.

"Rasionalisasi (subsidi) dan bantuan (disalurkan kerajaan) akan ditentukan berdasarkan penelitian dalam PADU dan pastinya selepas kita melaksana program bantuan yang akan dilaksanakan nanti, mungkin proses berikutnya akan lebih mudah," katanya.

Dalam pada itu, Mohd Uzir berkata, rekod pendaftaran hari terakhir menyaksikan peningkatan memberangsangkan apabila sejumlah 10.8 juta rakyat sudah mendaftar dan mengemas kini maklumat mereka setakat jam 12 tengah hari kelmarin.